

Nd.

506. Frumvarp til laga

[22. mál]

um Framkvæmdasjóð öryrkja.

(Eftir 2. umr. í Nd., 2. apríl.)

I. KAFLI

Skipulag og stjórn.

1. gr.

Stofna skal sjóð, er nefnist Framkvæmdasjóður öryrkja, og er hann í vörslu félagsmálaráðuneytisins.

2. gr.

Hlutverk sjóðsins er að greiða fyrir fjármögnun þeirra framkvæmda, sem gert er ráð fyrir í lögum, reglugerðum og áætlunum um sérkennslu og endurhæfingu (sbr. þó ákvæði 11.—13. og 14. gr.).

3. gr.

Tekjur sjóðsins eru:

- a) Tappagjald af áfengi, sem hækkar útsöluverð þess sem hér segir:
200 kr. á hverja heilflösku af sterku víni.
100 kr. á hverja hálfflösku af sterku víni.
100 kr. á hverja heilflösku af léttu víni.
50 kr. á hverja hálfflösku af léttu víni.
- b) Gjald, sem hækkar útsöluverð tóbaks sem hér segir:
20 kr. á hvern vindlingapakka.
2 kr. á hvern vindil.
20 kr. reyktóbak (pr. 50 gr. pakkningu).
Tekjustofnar þessir hækki hlutfallslega til samræmis við verðhækkanir á áfengi og tóbaki á hverjum tíma.
Ríkissjóði ber að gera skil á þessum tekjustofnum ársfjórðungslega.
- c) Fé, sem veitt er á annan hátt úr ríkissjóði.
- d) Frjáls framlög og aðrar tekjur, er til kunna að falla.
- e) Vaxtatekjur.

4. gr.

Félagsmálaráðherra skipar 5 manna sjóðsstjórn og jafnmarga til vara til tveggja ára í senn, þar af fjóra eftir tilnefningu eftirtalinna aðila, einn frá hverjum:
Öryrkjabandalagi Íslands, Landssamtökum Þroskahjálpar, menntamálaráðherra og heilbrigðis- og tryggingamálaráðherra.

Ráðherra skipar einn mann án tilnefningar og skal hann vera formaður sjóðsstjórnar.

Kostnaður við starfrækslu sjóðsins greiðist af tekjum hans.

5. gr.

Hlutverk sjóðsstjórnar er:

- a) að hlutast til um, að ávallt séu fyrir hendi áætlanir um sérkennslu og endurhæfingu, sem sjóðurinn gæti unnið eftir, sbr. 52. gr. laga nr. 63/1974 og 3. og 4. gr. laga nr. 27/1970;
- b) að taka ákvörðun um fjármögnun þeirra verkefna, sem þessar áætlanir taka til, að fengnum tillögum viðkomandi ráðuneytis, sbr. 10. og 12. gr.; ákvörðun sjóðsstjórnar um fjármögnun byggingarframkvæmda er þó endanlega háð samþykki viðkomandi ráðherra, sbr. 52. gr. laga nr. 63/1974 og 5. gr. laga nr. 27/1970;
- c) að hafa eftirlit með þeim verkefnum, er sjóðurinn veitir fjárframlög til, þannig að fjármagnið verðtryggist sem fyrst í þeim verkefnum, sem það er ætlað til.

6. gr.

Formaður sjóðsstjórnar annast daglegan rekstur sjóðsins á skrifstofu félagsmálaráðuneytisins eða annars staðar, telji ráðuneytið það æskilegt.

7. gr.

Ráðstöfunarfé sjóðsins skal skipt til héminga í tvo sjóðshluta, sérkennslusjóð og endurhæfingarsjóð.

Ef sjóðsstjórn er hins vegar sammála um, að nauðsynlegt sé að víkja frá þessu ákvæði, þá er það heimilt, að fengnu samþykki félagsmálaráðherra og menntamálaráðherra.

8. gr.

Ráðstöfunarfénu skal veitt ársfjórðungslega til verkefna, nema annað sé talið æskilegt að mati sjóðsstjórnar.

9. gr.

Fjármögnun verkefna skal fyrst og fremst ráðast af þeim brýnustu þörfum, sem leysa þarf hverju sinni.

Sérstakt tillit skal taka til þess fjölda einstaklinga, sem úrlausnar þurfa við á hverju sviði, og í hverju byggðarlagi, sbr. 10. og 12. gr. þessara laga.

Sjóðsstjórn skal hlutast til um, að við úthlutun fjármagns sé ekki ráðist í of mörg verkefni samtímis.

II. KAFLI

Sérkennslusjóður.

10. gr.

Menntamálaráðuneytið lætur sjóðsstjórn í té áætlun þá, er um getur í 5. gr. a, og tillögur um fjármögnun hennar.

Menntamálaráðuneytið lætur enn fremur fara fram reglulega endurskoðun hennar með tilliti til þess, sem gert hefur verið.

Menntamálaráðuneytið veitir sjóðsstjórn allar upplýsingar um sérkennslu, og þar á meðal reglulega könnun á sérkennsluþörf hvers byggðarlags sem og í landinu öllu.

11. gr.

Fjármagni sérkennslusjóðs skal jöfnum höndum varið til að standa straum af stofnkostnaði greiningarstöðva, sérskóla, sérdeilda, forskóladeilda sérskóla, dagvistunarstofnana (sérdeildir og almennar), starfsfræðslu- og starfsþjálfunardeilda að grunnskólanámi loknu, fjölskylduheimila eða heimavista í tengslum við sérstofn-

anir. Heimilt skal þó að nýta allt að 10% af ráðstöfunarfé sjóðsins til annarra sameiginlegra sérkennsluverkefna, sem ríki eða sveitarfélög greiða ekki, sbr. þó ákvæði 14. gr.

III. KAFLI

Endurhæfingarsjóður.

12. gr.

Félagsmálaráðuneytið í samráði við endurhæfingarráð lætur sjóðsstjórn í té áætlun þá, er um getur í 5. gr. a, og tillögur um fjármögnun hennar.

Félagsmálaráðuneytið lætur enn fremur fara fram reglulega endurskoðun hennar með tilliti til þess, sem gert hefur verið.

Félagsmálaráðuneytið í samráði við endurhæfingarráð lætur gera reglulega könnun á þörfinni fyrir endurhæfingar- og vinnustöðvar, með tilliti til hvers byggðarlags sem og í landinu öllu. Könnunin skal einnig ná til dvalarheimila.

13. gr.

Fjármagni endurhæfingarsjóðs skal jöfnum höndum varið til að standa straum af stofnkostnaði endurhæfingarstöðva, vinnustöðva og dvalarheimila sem ekki er eða fyrirsjáanlegt er að verði veitt til úr þeim lána- og styrktarsjóðum, er um getur í endurhæfingarlögum, nr. 27/1970, eða á annan hátt. Lána- og styrktarsjóðum þeim, sem um getur í endurhæfingarlögum, er skylt að veita sjóðsstjórn reglulega yfirlit yfir það fé, sem er til ráðstöfunar og fyrirhugað er til þessara framkvæmda. Heimilt skal þó að nýta allt að 10% af ráðstöfunarfé sjóðsins til annarra sameiginlegra endurhæfingarverkefna, sem ríki eða sveitarfélagi ber sannanlega ekki að greiða, sbr. þó ákvæði 14. gr.

IV. KAFLI

Önnur ákvæði.

14. gr.

Sjóðsstjórn er heimilt að veita fjármagni til annarra sérkennslu- og endurhæfingarverkefna umfram heimildarákvæði 11. og 13. gr., sé sjóðsstjórn sammála um, að slík verkefni séu þýðingarmeiri, og ef fjármagn sjóðsins nægir að öðru leyti til að standa undir hlutverki hans, sbr. 2. gr.

15. gr.

Ríkisendurskoðun skal sjá um endurskoðun á reikningum sjóðsins.

16. gr.

Lög þessi skulu endurskoðuð að 6 árum liðnum frá gildistöku þeirra.

17. gr.

Lög þessi öðlast þegar gildi.